

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 075462 24 K
Tešanj, 14.01.2026.godine

U IME FEDERACIJE BIH!

Općinski sud u Tešnju, po sudiji Besimi Ajanović, uz učešće zapisničara Hadžan Ninela, u krivičnom predmetu protiv optuženog M.M zv „H.“ sin Z., M. broj ..., D., zbog krivičnog djela „Ugrožavanje sigurnosti“ iz člana 183. stav 3. KZ F BiH, a po optužnici Kantonalnog tužilaštva ZE-DO kantona Zenica broj: T04 0 KT ... 23 od 25.10.2024. godine, nakon održanog glavnog i javnog pretresa dana 22.12.2025. godine u prisutnosti Kantonalnog tužioca Edina Čehajić i optuženog M. M., donio je i javno objavio u odsustvu KT Zenica i optuženog dana 25.12.2025.godine, sljedeću:

P R E S U D U

M. M., zv. „H.“, sin Z. i majke Dž., rođene K., rođen ... godine u D., gdje je i nastanjen na adresi M. broj ., D., sa završenom osnovnom školom, po zanimanju radnik, nezaposlen, razveden, samohrani roditelj, otac dvoje mladb. djece, lošeg imovnog stanja, služio vojsku 2001. godine, Bošnjak, državljanin BiH, JMB ..., višestruko osuđivan za razna krivična djela

K R I V J E

Što je:

dana 12.04.2023. godine, oko 22,00 sati, na području općine Tešanj, u mjestu Jelah, ugrozio sigurnost svoje bivše supruge H. Dž., na način da je istu uznemiravao na mobilni telefon putem aplikacije „messenger“ sa profila „N. N. (M. M.)“ upućujući joj ozbiljne prijetnje audio porukom „Sad ću doći da ti uzmem dijete, a tebi ću poizbijati sve zube što si popravila, mamu ti jebem“, a ubrzo nakon toga se vozilom Golf 5, plave boje i pojavio ispred stambene zgrade u kojoj stanuje Dž. i sa istog profila joj slao poruke sa sadržajem ozbiljnih prijetnji „ Imaš od sad problem, ako imaš kog pulina, evo ja ću lokaciju rado poslat da vam se plemena najebem, djetu ti pleme jebeš“, „Evo sad ću sa kerom dole kod škole sić hajd veličino dovedi što više vas da izginete mater ti jebem, hajd nisam te htio dirat radi I.“ iako je znao i bio svjestan da će na taj način kod iste izazvati strah i uznemirenje, što je i htio, koje prijetnje je Dž. shvatila ozbiljno i koje su kod nje izazvale osjećaj nesigurnosti i straha za vlastiti život,

dakle, uznemiravanjem i prijetnjama ugrozio sigurnost osobe s kojom je održavao bliske veze

čime je počinio krivično djelo „Ugrožavanje sigurnosti“ iz člana 183. stav 3. KZ F BiH, pa se na osnovu istih zakonskih odredaba, te odredaba člana 43. i 49. KZ F BiH, optuženi

OSUĐUJE
NA KAZNU ZATVORA U TRAJANJU OD 6 (ŠEST) MJESECI

Optuženi se oslobađa plaćanja troškova krivičnog postupka i isti padaju na teret budžetskih sredstava.

Privremeno oduzet mobilni telefon marke Iphone 8, sive boje, sa SIM karticom operatera telekomunikacije „Halo“, sa oštećenjem stakla na sredini i u donjem lijevom uglu od optuženog prema Potvrdi o privremenom oduzimanju predmeta broj: ... od 28.12.2023.godine, nakon pravosnažnosti presude imaju se vratiti optuženom od strane PS Tešanj.

O b r a z l o ž e n j e

Kantonalno tužilaštvo ZE-DO Kantona Zenica optužnicom broj: T04 0 KT ... 23 od 25.10.2024. godine, optužilo je M. M. zbog krivičnog djela „Ugrožavanje sigurnosti“ iz člana 183. stav 3. KZ F BiH, na način, vrijeme i mjesto kako je to opisano u dispozitivu navedene optužnice.

Sudija za prethodno saslušanje ovog suda je predmetnu optužnicu potvrdio dana 04.11.2024.godine i zakazao ročište radi izjašnjenja o krivnji.

Na ročištu za izjašnjenje o krivnji koje je održano dana 05.12.2024.godine, optuženi M. M. je porekao krivnju po navedenoj optužnici, te je spis proslijeđen postupajućem sudiji radi zakazivanja glavnog pretresa.

Na glavnom pretresu održanom dana 05.12.2025.godine i dana 22.12.2025.godine Kantonalni tužilac je pročitao optužnicu te izjavio da u cijelosti ostaje kod svih prijedloga dokaza kako subjektivnih tako i dokaza objektivne prirode koji su navedeni u optužnici.

Optuženi u uvodnom izlaganju u svoju odbranu je naveo da se ne smatra krivim i da nije počinio djelo koje mu se optužnicom stavlja na teret, da nije imao namjeru da ide na Dž. adresu nego da kada ga je nazvala da dođe da je on njoj rekao a izrevoltiran time što je ona rekla da ima svoje neke ljude da će doći, polomiti mu kičmu i na što je on njoj odgovorio da je on kod svoje kuće i pošto mu je ista prijetila nekim svojim ljudima da je on njoj rekao da će poslati lokaciju i da će izaći s cukom ako joj to zadovoljstvo pa da dođe sa tim svojim ljudima na čemu se sva rasprava i završila, tako da od toga svega ništa nije ustvari nije se ni desilo osim njihove prepirke i loše komunikacije a što je po optuženom danas izgleda postalo normalno kod ovakvih situacija. Da je u septembru 2024.godine bio isto optužen pred ovim sudom za Ugrožavanje sigurnosti iste Dž. gdje je oslobođen za isto to djelo. Da što se tiče Dž. tada već S. nije bilo pojašnjenja djela kao i u ovome slučaju da je on htio sina da vidi i da se druži s njim i da mu Dž. to stalno kao i sada uskraćivala i nije dozvolila, da do dana današnjeg nikad nije vidio svog I., da telefon koji mu je oduzet da nije predmetni dokaz ovog postupka i traži da mu se isti vrati, da se odbaci sve optužnice protiv njega u ovom procesu i da nije došlo do bilo kakvog ugrožavanja sigurnosti, da traži da se oslobodi bilo kakve krivične odgovornosti i da se ukine krivična odgovornost i traži oslobađajuću presudu.

U toku dokaznog postupka Tužilaštvo je provelo sljedeće dokaze:

U svojstvu svjedoka saslušana je svjedok-oštećena H. Dž.

Kao dokaz uveden je Zapisnik o saslušanju svjedoka H. Dž. u PS Tešanj broj: ... od 13.04.2023.godine.

Provedeni su materijalni dokazi, te je izvršen uvid i čitanje u materijalne dokaze i to: Standardizirani policijski izvještaj PS Tešanj broj: ... od 12.04.2023.godine, Naredbu Općinskog suda u Tešnju broj 39 0 K ... 23 Kpp od 26.12.2023. godine, Potvrdu o privremenom oduzimanju predmeta PS Tešanj broj: ... od 28.12.2023. godine, Zapisnik o izvršenoj radnji privremenog oduzimanja predmeta i popisu privremeno oduzetih predmeta PS Tešanj broj: ... od 28.12.2023. godine, Naredbu Općinskog suda u Tešnju broj 39 0 K ... 24 Kpp od 04.01.2024. godine, Zapisnik o pretresanju mobilnog telefonskog aparata PS Tešanj broj: ... od 16.01.2024. godine, Fotodokumentacija PS Tešanj od 28.12.2023. godine sa datumom izrade 16.01.2024. godine- pretres mobilnog telefona kod optuženog, Fotodokumentacija Uprava policije, Sektor kriminalističke policije Sarajevo od 27.02.2024. godine (sa datumom izrade 28.02.2024. godine), CD sa snimkom audio poruke prijetećeg sadržaja i Izvod iz kaznene evidencije za optuženog M.M. PU Doboje od 21.04.2023. godine.

Na prijedlog odbrane provedeni su dokazi uvidom u: rješenje Centar za socijalni rad Doboje broj: ... od 17.01.2019.godine i molbu od 15.09.2025.godine a vezano za viđanje M. I. zajedničkog djeteta optuženog i H. Dž.

Provedene dokaze sud je cijenio savjesno i to kako svaki dokaz pojedinačno tako i njihovoj međusobnoj vezi pa je na osnovu takve ocjene dokaza odlučio kao u izreci presude a iz sljedećih razloga:

Da je optuženi M. M. dana 12.04.2023. godine, oko 22,00 sati, na području općine Tešanj, u mjestu Jelah, ugrozio sigurnost svoje bivše supruge H. Dž., na način da je istu uznemiravao na mobilni telefon putem aplikacije „messenger“ sa profila „N. N. (M. M.)“ upućujući joj ozbiljne prijetnje audio porukom „Sad ću doći da ti uzmem dijete, a tebi ću poizbijati sve zube što si popravila, mamu ti jebem“, a ubrzo nakon toga se vozilom Golf 5, plave boje i pojavio ispred stambene zgrade u kojoj stanuje Dž. i sa istog profila joj slao poruke sa sadržajem ozbiljnih prijetnji „Imaš od sad problem, ako imaš kog pulina, evo ja ću lokaciju rado poslat da vam se plemena najebem, djetu ti pleme jebeš“, „Evo sad ću sa kerom dole kod škole sić hajd veličino dovedi što više vas da izginete mater ti jebem, hajd nisam te htio dirat radi I.“ iako je znao i bio svjestan da će na taj način kod iste izazvati strah i uznemirenje, što je i htio, koje prijetnje je Dž. shvatila ozbiljno i koje su kod nje izazvale osjećaj nesigurnosti i straha za vlastiti život, sud je utvrdio na osnovu iskaza svjedoka H. Dž. kao i na osnovu provedenih materijalnih dokaza optužbe.

Svjedok H. Dž. u svom iskazu na glavnom pretresu koji je održan dana 22.12.2025.godine je izjavila da je u braku sa optuženim bila dvije godine i osam mjeseci i da u braku imaju jedno zajedničko dijete od 8 godina, da je više puta od optuženog dobijala prijetnje, tako da se precizno ne može sjetiti koja i kakva poruka je kada upućivana njoj, da su uglavnom poruke bile prijetnja u fazonu „poginuti, olešiti i sl.“, da je dobila i glasovnu poruku, da misli da je poruka bila u fazonu kao „mogao bi

ti ja te zube poizbijati“ nešto na takav način, da je bila u sigurnoj kući zbog nasilja od strane M. M., da je optuženi imao više profila pod nazivom „N. U., N. N.“ i da je uvijek bilo pod lažnim imenom da se ona boji za svoju sigurnost i vlastiti život.

Obzirom da se svjedokinja nije mogla sjetiti tačnog datuma događaja u odnosu na slanje audio poruke i naziva „Facebook“ i „Messenger“ profila s kojeg su poruke slate, a zbog protoka vremena svjedokinji je predložen Zapisnik o njenom saslušanju u PS Tešanj od 12.04.2023.godine, nakon čega je svjedokinja izjavila da ostaje u cjelosti kod date izjave u PS Tešanj, a da se danas nije mogla precizno sjetiti jer je u više navrata sa raznih profila dobijala poruke od M. M.

Cijeneci iskaz ovog svjedoka čiji iskaz dat pred sudom kao i u PS Tešanj sud cijenio kao jednu cjelinu i čijem iskazu sud poklonio vjeru, te dovodeći iskaz ovog svjedoka u međusobnu vezu sa materijalnim dokazima optužbe nesumnjivo proizilazi da je optuženi oštećenju na njen mobilni telefon putem aplikacija Messenger i sa profila „N. N.“ upućivao ozbiljne prijetnje, audio porukom „sad ću doći da ti uzmem dijete a tebi ću poizbijati sve zube što si popravila, mamu ti jebem“, te prijetnje „imaš od sada problem ako imaš tog pulina evo ja ću lokaciju rado poslat da vam se plemena najebem, dijete ti pleme jebeš“, „Evo sad ću sa kerom dole kod škole sić hajd veličino dovedi što više vas da izginete mater ti jebem, hajd nisam te htio dirat radi Idriza“. Ovo proizilazi prije svega iz materijalnih dokaza i to: Fotodokumentacije Uprave policije, Sektor kriminalističke policije Sarajevo od 27.02.2024.godine sa datumom izrade 28.02.2024.godine na kome su sadržane poruke sa upućenim prijetnjama iz činjeničnog opisa optužnice, kao i iz CD snimka, audio poruke koje su preslušane u prisustvu optuženog na glavnom pretresu održanog dana 22.12.2025.godine, a što je sve potvrđeno i iskazom oštećene H. Dž.

Radnja izvršenja ovog krivičnog djela je ugrožavanje sigurnosti ozbiljnom prijetnjom napad na život ili tijelo određene osobe, a posljedica je ugrožavanje osjećaja sigurnosti, ugrožavanje prava na nesmetan i miran život, osjećaj uznemirenosti, stvaranje stanja nespokojsva, izazivanje straha i narušavanje osjećaja pravne sigurnosti, pa kako iz dokaza optužbe nesumnjivo proizilazi da je optuženi upućivao ozbiljne prijetnje oštećenju i da su te prijetnje kod nje izazvale osjećaj uznemirenosti i straha za vlastiti život to su se u ovakvim radnjama optuženog stekla su se sva bitna obilježja krivičnog djela „Ugrožavanje sigurnosti“ iz člana 183. stav 3. KZ FBiH jer je optuženi uznemiravanjem i prijetnjom ugrozio sigurnost osobe s kojom je održavao bliske veze, pa kako je optuženi bio svjestan svog djela i htio njegovo izvršenje te kako ne postoje okolnosti koje isključuju krivičnu odgovornost optuženog to je sud optuženog oglasio krivim i osudio kao u izreci ove presude.

Prilikom odlučivanja o vrsti i visini krivično pravne sankcije na strani optuženog sud je cijenio sve okolnosti koje su od uticaja za odmjeravanje kazne. Od olakšavajućih okolnosti sud je našao da je porodičan, da ima dvoje djece od koje dijete M. M. je dodijeljeno njemu na staranje i izdržavanje kao i njegovo korektno ponašanje tokom suđenja, a od otežavajućih okolnosti sud je našao da je optuženi do sada osuđivan, pa je optuženog i osudio na kaznu zatvora u trajanju od 6 (šest) mjeseci, smatrajući da će sa izrečenom osudom u cijelosti postići svrha kažnjavanja, kako sa aspekta generalne, tako i sa aspekta specijalne prevencije.

Dokaze odbrane i to: rješenje Centar za socijalni rad Doboj broj: ... od 17.01.2019.godine i molbu od 15.09.2025.godine a vezano za viđanje M. I. zajedničkog djeteta optuženog i H. Dž., sud je cijenio prilikom odlučivanja o vrsti i visini krivično-pravne sankcije optuženog a u odnosu na krivično pravnu stvar su irelevantni jer se ne tiču krivično-pravne stvari o kojoj se raspravljalo.

O imovinsko pravnom zahtjevu sud nije odlučivao obzirom da je oštećena na glavnom pretresu održanog dana 22.12.2025.godine izjavila da ne potražuje štetu od optuženog.

U smislu odredbe člana 202. stav 4. optuženi se oslobađa plaćanja troškova krivičnog postupka i isti padaju na teret budžetskih sredstava jer se radi o nezaposlenom licu i licu koji se nalazi na izdržavanju kazne zatvora.

Privremeno oduzet mobilni telefon marke Iphone 8, sive boje, sa SIM karticom operatera telekomunikacije „Hallo“, sa oštećenjem stakla na sredini i u donjem lijevom uglu od optuženog prema Potvrdi o privremenom oduzimanju predmeta broj: ... od 28.12.2023.godine, nakon pravosnažnosti presude imaju se vratiti optuženom od strane PS Tešanj.

Sud je na zahtjev optuženog donio odluku o vraćanju mobilnog telefona koje privremeno oduzet od optuženog jer tokom postupka nije dokazano da postoji opasnost da će isti telefon biti ponovo upotrijebljen za učinjenje krivičnog djela a po ocjeni suda ne postoje ni drugi razlozi u smislu odredbe člana 78. KZ FBiH za njegovo oduzimanje pa je i odlučeno da se isti vrati optuženog nakon pravosnažnosti ove presude od strane PS Tešanj.

Imajući u vidu navedeno sud je odlučio kao u izreci presude.

PRAVNA POUKA:

Protiv ove presude dozvoljena je žalba Kantonalnom Sudu Zenica u roku od 15 dana od dana prijema presude. Žalba se podnosi putem ovog suda u dovoljnom broju primjeraka za sud i suprotnu stranu.

S u d i j a

Besima Ajanović